

# Irakin Ana Waaki te Ekaretia irouia Aomata Ake a Kan Bita Rikiia bwa Mwaane ke Aine

TUUA NI KAIRIIRI IBUKIIA TAN KAIRIIRI N TE TABO

Te rongorongono aei e karinaki ni buoka te kaetieti are n te *Aeniboki ni Kabuta*, 38.6.23, “Aomata Ake a Kan Bita Rikiia bwa Mwaane ke Aine.” Te kantaninga n aei bwa e na buokiia taan kairiiri n te tabo n anga taian reirei ma te aomata ao aia utu iaon aron tabeua waaki ni irakin ana waaki te Ekaretia.

## Kainibaire ni Kabuta

N taian keiti ni kabane, taan kairiiri n te tabo:

- Ukoukora ana kairi te tamnei.
- Butimwaea te aomata ao ana utu ma te tangira ao te karinerine ngkai ko reirei iaon koauan te euangkerio.
- Iangoa kainnanon te aomata ao kaain te uote ake tabeman.
- Kakoauaa bwa ana reirei aika koaua te Ekaretia i aon rikin temanna bwa te mwaane ke te aine e aki kataorikakaki ke n aki mataata.
- Ukorii taian reirei. Bitiobi a marooro ma te beretitenti n te titeiki. Beretitenti n te titeiki ao n te mition a ukori kairia mairoun te Beretitentii n te Aono.
- Kairekerekeaia kaaro ke taan tararuaia ataei aika a uarereke.

## Aara ae a Tangiraki ao Aron Weteaia

Te rekooti n te Ekaretia ae kinaaki e kaota aron rikin te membwa bwa te mwaane ke te aine ngke e bungiki.

Kabonganaan te ara ao aron weteakin temanna e a bon tiku imarenan te aomata ao aia utu, raoraona, ao kaain te Ekaretia. Taan kairiri n te tabo a na aki bairea ke n tua bwa aekara aron ataakin te aomata irouia membwa.

Ngkana te membwa iai arana ae tangiria ni weteaki iai, e na kaotaki n te tabo are “Aara ae e Tangiraki ao Aron Weteaia ” iaon te membwatibu rekooti.

## Bootaki ao Waaki ni Kakukurei aika Onoti–N Rikim ae te Mwaane ao Aine

Aomata ake a kaei bootaki ao waaki ni kakukurei–n rikim ae te mwaane ao aine n ira aron rikiia ngke a bungiki.

Te kariaiakaki ae onoti, ae riai n aki rereke, e riai n toua mwiin raoi te Kainibaaire ni Kabuta ae kaotaki ieta ao ni kariaiakaki iroun te Beretitentii n te Aono.

## Waaki ni Kakukurei ni Bwakanakon Tai

Ibukin waaki ni kakukurei ni bwakanakon tai ake a bon onoti n rikim ae te mwaane ao aine, aomata a ti irii

kaembwa ake a botau nakon rikiia ngke a bungiki. Katooto n aron waaki ni kakukurei aikai n aron aia kaembwa Ataeinnaine ao aia kaembwa kaain te Kooram n te Nakoanibonga ae te Aaron.

Ibukin waaki ni kakukurei ni bwakanakon tai ake aki onoti n rikim ae te mwaane ao aine, aomata ake a ukora karaoran te korokoro iaia, bwainaoraki, ke ni bitii aroia n reitaki ma aomata nakon are bon rikiia ngke a bungiki a na kitana te waaki ni kakukurei ngkana e bong. E na kaokaki tararuaia kairake akanne nakoia karo ke taan tararuaia, ake bon tabeia baireakin aia tabo n tiku. Katooto ni waaki ni kakukurei ake aki onoti n rikim ae te mwaane ao aine n aron aia maungatabu kairake ni ikawai, aia maungatabu Ibukin Kakorakoraia Kairake, ao aia maungatabu kairake.

## Weewete ao Katabeaki

Aomata ake a ukora karaoran te korokoro iaia, bwainaoraki, ke ni bitii aroia n reitaki ma aomata nakon are bon rikiia ngke a bungiki a na bon aki weteaki ke ni katabeaki bwa (1) a na kakoroi nanon mwioko nakon rikim n onoti ae te mwaane ao aine, (2) ni beku bwa te tia reirei, ke (3) ni mwakuri ma ataei ke kairake. A kona ni karekei wewete riki tabeua ke katabeaki ake a na katauraao te tai n rikirake ao ni beku ibukiia tabeman.

## Taian Roki n Ana Kateitei te Ekaretia

A riai taian roki ni karekea ae ko raba iai ao te tabo ae mano. E na riai n taraaki raoi bwa iai karineakin ana waaki ao taraan kakanatoia aomata nako.

Aomata ake a ukora karaoran te korokoro iaia, bwainaoraki, ke ni bitii aroia n reitaki ma aomata nakon are bon rikiia ngke a bungiki a riai ni kabongana te roki ae ti temanna kaaina ngkana e riai.

Ngkana e aki tauraoi te roki ae ti temanna kaaina, te tia kairiiri n te tabo e na marooro ma te aomata (ao te karo ke te tia tararua te kairake) ni kakaia tokin te kangaanga. Waaki aika a na taraaki a raonaki ma:

- Kabonganaa te roki are e bon kaineti ma rikin te aomata ae te mwane ke aine ngke e bungiki.
- Kabonganaa te roki are e kaineti nakon aron ana namakin te aomata i bon irouna bwa te mwaane ke aine, ma temanna ae onimakinaki ni kakoauaa bwa a na akea ae e na kabongana te roki n te tai anne.